

Erich Bolinius

Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 29.3.2012 18.05 Uhr auf 94.0 bzw. 87,7)**

Leev Toehörers,
dit Maal hett Kickers mi mit ´n Spölbericht in Stich laten. Un worum? Kickers hett van sük ut dat Spöl tegen Göttingen ofseggt, wall se – so Gerd Krauledat – neet genug Spölers harren. Dat is leep skaa, meen ik. Aber villicht ok goed, wenn man mit hoog Niederlaag toerüggkomen was, dann kunn dat de jung Spölers ok verunsekern. Un Kickers hett bobendien ok noch ruugweg 1000 Euro spaart. Man noch eenmal dürt un sull Kickers dat neet maken. Dann kann man de komende Saison neet in de Landesliga uplopen. Un dat was de Dood van de Kickersmannskupp, dor bün ik mi seker. Hopen wi all, dat an Weekenenn mit dat Spöl tegen Rotenbörg klappt. Hopentlik komen de. Toeseggt hemmen se ja.

Over de Jögdmannskupp U19 toe lesen, maakt upstünns recht Spaaß. De Jungs wunnen hör Spöl tegen de FC Verden mit 5:1 un hebben sük dormit up de Upstieg in de Regionalliga toerüggmeldt. In EZ-Bladd wurr van ´n 5:1 over SC Langenhagen schreven. Man dat stimmte neet. Langenhagen föhrt de Tabell aber an. De Emden Jungs harren Verden van Anfang an vull in Greep. Al in de 8. Menüte truff Yannik Haubner toe dat 1:0. Noch vör de Paus truff he toe dat 2:0. As dat Tor för Verden full, wurr dat för Kickers noch maal eng. Man befreete Andreas Flessner mit sien moi Tor ut 16 Meter Kickers. Tido Steffens skoot dorna noch twee Toren för Kickers Emden.

De C-Junioren kunnen neet so uptrumpfen as de U19. Se verloren hör Spöl tegen VFB Oldenbörg mit 0:4. De Kickersjungs kunnen anfangs goed mithollen. Se stunnen in de Achtermannskupp kompakt, as man vandaag seggt. Eerst in 24. Menüte full dann doch för Oldenbörg dat 1:0. In de 56. Menüte harr Tido Janssen ´n heel goed Kans toe de Utglik. Man de Torwart hull de Ball. Ja, dann gung neet mehr völ un Oldenbörg kunn de 4:0 Sieg infahren. In de komende Spölen geiht dat för Kickers nu dorum, bi de Mannskuppen, de ok unnern drin stahn, toe punkten.

För de 1. Mannskupp van Kickers Emden geiht dat, as anfangs al seggt, tegen Rotenburg. De stahn ok heel unnern in de Tabell. Was moi, wenn dat Spöl ok würrelk dörföhrt word un Kickers sien Fans maal weer ´n moi Spöl wiesen kunn. Wenn dann doch wunnen worden kann, umso beter.

So, nu as alltied, noch ´n Foetballwitz.

Stefan verseggt bi sien Fründin Susanne up de heel Linie. He murmelt zerknirscht: „Raar, up de Foetballplatz bün ik immer in Hoogform.“ „Goed;“ seggt se, „dann versöken wi dat mörgen mal dor.“

So, leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt netso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.